

Z A P I S N I K

sa 13.sjednice Predstavničkog doma Parlamentarne skupštine
Bosne i Hercegovine, održane 23-24.11.1999.

Trinaestoj sjednici Predstavničkog doma prisustvovao je 31 poslanik.

Odsustvo sa sjednice najavili su Ivo Mijačević, Pero Skopljak, Bogić Bogićević, Ljubomir Zovko, Branislava Jovanović, Vito Rakić, Nikola Špirić i Branko Dokić. U toku dana sjednicu su napustili Ibrahim Spahić i Mara Perkanović zbog odlaska na službeni put. Poslanik Vito Rakić je prisustvovao nastavku sjednice 24.11.t.g. Sa cijelog toka sjednice odsustvovao je poslanik Edhem Bičakčić.

Na početku sjednice predsjedavajući je informisao Dom da je Kolegij dogovorio da će se prije svake sjednice održavati sjednica sa predsjednicima klubova poslanika i poslanicima stranaka koje nemaju klubove u Parlamentu, na kojima će se usaglašavati stavovi oko dnevnog reda, kao i druga pitanja oko kojih se gubi puno vremena na sjednicama Doma. Takođe je obavijestio poslanike da je takav sastanak održan danas i da je na istom dogovoreno da će se do Nove godine održati tri sjednice Doma na kojima će se razamtrati sve iz Programa rada što nije sadržano u ovoj sjednici, te da će se o tome obavijestiti Vijeće ministara kako bi u skladu sa našim programom mogao pripremiti materijale.

Predsjedavajući je naglasio da su svi prisutni podržali ovakav metod dogovaranja Kolegija i predstavnika klubova poslanika, kao i to da će u toku ove sjednice svi poslanici dobiti plan održavanja sjednica do Nove godine sa okvirnim prijedlogom dnevnog reda. Za predložene tačke za koje se ne dobiju materijali u skladu sa Poslovníkom i koji ne prođu određenu poslovničku proceduru, neće biti stavljeni u konačan dnevni red, rekao je pored ostalog, predsjedavajući Mirko Banjac.

Nakon upoznavanja poslanika sa prednjim dogovorom na konsultativnom sastanku, predsjedavajući je pročitao prijedlog dnevnog reda za 13. sjednicu.

O prijedlogu dnevnog reda nije bilo diskusije.

Sa 26 glasova za i 5 uzdržanih, za 13. sjednicu usvojen je sljedeći

D N E V N I R E D:

1. Usvajanje zapisnika sa 11. sjednice Predstavničkog doma,
2. Razmatranje Prijedloga zakona o imigraciji i azilu BiH,
3. Razmatranje Prednacrta poslovnika Predstavničkog doma,

4. Davanje saglasnosti za ratifikaciju sljedećih sporazuma:
 - a) Sporazuma o socijalnom osiguranju između Bosne i Hercegovine i Republike Austrije sa Protokolom o provođenju Sporazuma,
 - b) Sporazuma o zajmu između Socijalnog fonda za razvoj Vijeća Evrope i Bosne i Hercegovine o regulisanju predratnog duga BiH, sa usaglašenom i potpisanom alokacijom obaveza prema Socijalnom fondu od Ministarstva finansija Federacije BiH, i Odlukom o prihvatanju zaduženja prema Fondu za socijalni razvoj Evrope po kreditima korištenim prije 2.4.1992. godine donesene od Vlade Republike Srpske,
 - c) Sporazuma o slobodnom tranzitu preko teritorije Republike Hrvatske u i iz Luke Ploče i preko teritorije Bosne i Hercegovine,
 - d) Ugovora o garanciji (Projekat mreže za prenos električne energije, sistem upravljanja električnom energijom) između BiH i Evropske investicione banke, sa ugovorima o garanciji potpisanim od Ministarstva vanjske trgovine i ekonomskih odnosa, Ministarstva finansija Federacije BiH i Ministarstva finansija Republike Srpske,
 - e) Sporazuma o zajmu (Projekat hitnog unapređenja elektroenergetskog sistema) između Japanskog fonda za prekomorsku ekonomsku saradnju (OECD) i Bosne i Hercegovine,
5. Poslanička pitanja i prijedlozi.

Ad – 1: Usvajanje zapisnika sa 11. sjednice Predstavničkog doma

U vezi sa zapisnikom diskutovao je poslanik Ibrahim Spahić i, pored ostalog, rekao da je ministar Mirsad Kurtović u svom izlaganju na 11. sjednici rekao da će se Vijeće ministara uskoro pojaviti sa dokumentom o ekonomskoj i socijalnoj politici na nivou Bosne i Hercegovine, te da se to u zapisniku konstatuje, kako bi se iz zapisnika vidjela obaveza Vijeća ministara da sačini taj dokument, a što je u vezi sa inicijativom grupe poslanika koju je Kolegij uputio Vijeću ministara radi operacionalizacije.

Uz prednju primjedbu Dom je usvojio Zapisnik sa 11. sjednice Predstavničkog doma. Za Zapisnik je glasalo 26 poslanika, a 5 je bilo uzdržanih.

Ad – 2: Razmatranje Prijedloga zakona o imigraciji i azilu Bosne i Hercegovine

Predsjedavajući mirko Banjac je u uvodu napomenuo da je ovaj zakon ponovo stavljen na dnevni red na inicijativu OHR-a.

U diskusiji su učestvovali: Ivo Divković, Alma Čolo i Mirko Banjac.

Poslanik Ivo Divković je predložio da se usvoji zaključak, da Vijeće ministara donese određene podzakonske akte kojim bi regulisao i definisao određena pitanja vezana za nepreciznost nekih odredbi zakona, npr. čl. 5.pod d), čl. 20. pod b) i čl. 27. Naglasio je da treba definisati ko će i na osnovu čega utvrditi razloge koji se u ovim odredbama propisuju.

Poslanik Mirko Banjac obrazložio je amandman koji je podnio na član 1. Prijedloga zakona, naglasivši da se njime usklađuje taj član sa Ustavom Bosne i Hercegovine.

Pošto je amandman podnesen neposredno prije početka današnje sjednice o istom se nije izjasnilo Vijeće ministara, pa je predsjedavajući dao pauzu kako bi Vijeće ministara održalo sjednicu i zauzelo stav o amandmanu.

Poslije pauze zamjenik ministra civilnih poslova i komunikacija, gospodin Nudžeim Rečica, informisao je Dom da Vijeće ministara nije bio u mogućnosti da se sastane iz razloga što su odsutni članovi Vijeće iz reda srpskog naroda. Zamolio je Dom da danas usvoji zakon u predloženom tekstu o kojem je postignut konsenzus u Vijeću ministara i koji je podržan od OHR-a, UNHCR-a i Vijeće Evrope.

Dalje su povodom ovog amandmana diskutovali Miodrag Deretić, Mirko Banjac i Haris Silajdžić.

Poslije diskusije i jedne pauze na zahtjev Kluba poslanika za CDBiH, dalja rasprava o Prijedlogu zakona o imigraciji i azilu odložena je za naredni dan, do kada će se sastati Vijeće ministara i zauzeti stav o amandmanu Mirka Banjca.

Ad – 3: Razmatranje Prednacrta poslovnika Predstavničkog doma

Predsjedavajući je u uvodu podsjetio poslanike da su Prednacrt poslovnika dobili u 9. mjesecu, a da su u međuvremenu stigli komentari i primjedbe predstavnika PHARE projekta g. Fernanda Santaolale. Naglasio je da je Kolegij raspravljao o Prednacrtu i odlučio da formira radnu grupu sastavljenu od tri člana Sekretarijata i eksperata, koja će izvršiti reviziju teksta Prednacrta, kako bi Kolegij mogao pripremiti Nacrt poslovnika. Pozvao je poslanike da danas raspravljaju u načelu, a da u roku od sedam dana dostave pisane primjedbe i prijedloge, nakon čega bi se pripremio Nacrt poslovnika.

U diskusiji su učestvovali Suada Muminagić, Miodrag Deretić, Rasim Kadić, Alma Čolo, Ana Havel i Mirko Banjac.

Poslije diskusije predsjedavajući je konstatovao da će se magnetogram diskusija o Prednacrtu poslovnika dostaviti Kolegiju radi korištenja u daljem radu na pripremi prijedloga stalnog poslovnika Predstavničkog doma.

Ad – 4: Davanje saglasnosti na sporazume...

U ime Komisije o međunarodnim i spoljnim poslovima poslanik Ivo Divković je upoznao Dom da je Komisija razmatrala sporazume iz dnevnog reda i sve podržala, s tim što je u vezi sa sporazumom pod a) postavljeno pitanje – da li se Sporazum odnosi i na studente iz Bosne i Hercegovine u Austriji, i pod c) – u čijoj je nadležnosti formiranje upravnog odbora i apelacione komisije.

Predsjedavajući Komisije o ustavnim i pravnim pitanjima, g. Rasim Kadić, iznio je stav te komisije, da postoji ustavni osnov za dvanje saglasnosti za ratifikaciju svih pet ponuđenih sporazuma.

Poslanik Suada Muminagić je u diskusiji povodom ove tačke dnevnog reda, pored ostalog, istakla da je prije sjednice Doma trebalo da se održi i sjednica Komisije za finansije i Budžet, ali da nije održana jer nije došao ni predsjednik ni članovi Komisije, niti je predsjednik Komisije prenio obavezu na svog zamjenika. Istakla je da ne može prihvatiti takav neodgovoran rad i da je bilo razloga da ova komisija razmatra predmetne sporazume.

Gospođa Muminagić je podsjetila da je Komisija za finansije i Budžet ranije zatražila da Vijeće ministara pripremi informaciju o zaduženju BiH, koja još nije stigla, a

i sa ovim sporazumima se preuzimaju znatne obaveze, te da je Komisija i sa tog stanovišta trebala da da svoje mišljenje.

Povodom postavljenih pitanja govorio je ministar Mirsad Kurtović i odgovorio na neka pitanja, te naglasio da je Vijeće ministara pripremio informaciju o zaduženosti BiH zaključno sa 30.6.1999. godine, koja je već trebala biti dostavljena Parlamentu.

Poslije diskusije Predstavnički dom je dao saglasnost za ratifikaciju svih pet sporazuma iz dnevnog reda. Za davanje saglasnosti glasalo je svih 25 prisutnih poslanika.

Ad – 5: Poslanička pitanja i prijedlozi

U okviru ove tačke dnevnog reda predsjedavajući **Mirko Banjac** je zapitao ko je poslanicima dostavio izvjesni upitnik za biografiju, bez ikakvog objašnjenja, naglasivši da su njega to isto pitali i poslanici. Izrazio je negodovanje zbog toga i skrenuo pažnju Sekretarijatu Parlamentarne skupštine da se poslanicima ne dostavljaju nikakvi upitnici bez znanja Kolegija Doma.

Poslanik **Miodrag Deretić** je izrazio nezadovoljstvo odgovorom na njegovo pitanje postavljeno 10.9.1999. – Dokle je došla Komisija za granice Bosne i Hercegovine sa postupkom nadoknade teritorije Republici Srpskoj do 49%, kako je utvrđeno Dejtonskim sporazumom. S obzirom da je Komisija odgovorila da nije nadležna da razmatra pitanje međuentitetske linije razgraničenja, kao ni druga pitanja iz Dejtonskog sporazuma koja se tiču procentualnog odnosa teritorija entiteta, poslanik Deretić je postavio sljedeće pitanje:

Ko je nadežan za to i šta je do sada napravljeno u tom smislu?

Poslanik Deretić je naglasio da je 10.septembra 1999.godine postavio još jedno pitanje – **Da li supervizor za Brčko ima nadležnosti izvan granica opštine Brčko, konkretno u području Arizone, i da li, prema Dejtonskom sporazumu, Ustavu BiH i Ustavu RS ima mogućnost da ukida grančnu liniju u oblasti Brčkog,** na koje nije do danas dobio odgovor.

Poslanik **Rasim Kadić** je postavio pitanje, koje je svojevremeno postavila poslanik Mediha Filipović, a na koje nije odgovoreno – **Šta Ministarstvo vanjskih poslova i Predsjedništvo BiH poduzimaju na omekšavanju viznog režima sa zemljama potpisnicama Pakta o stabilnosti za Jugoistočnu evropu.**

Poslanik Kadić je postavio i sljedeće pitanje:

Da li je moguće da Vijeće ministara Parlamentu dostavi pregled svih zemalja sa kojima imamo potpisan bezvizni režim, s kojima imamo potpisan vizni režim i koliki je iznos viza koje naplaćuje Bosna i Hercegovina, i obrnuto, iznos viza koje naplaćuju zemlje za koje mi trebamo dobiti vizu?

Poslanik **Abdurahman Malkić** postavio je pitanje:

Zašto nije kada će biti gotov tekst Himne Bosne i Hercegovine. Predložio je da se u što kraćem vremenu raspiše konkurs za tekst Himne BiH.

Ovim je završen rad 13. sjednice za 23.11.1999.godine.

Nastavak 13. sjednice održan je 24.11.1999.godine.

Na početku nastavka predsjedavajući je iznio prijedlog Kluba poslanika Hrvatske demokratske zajednice da se u Komisiju o ustavnim i pravnim pitanjima izabere poslanik Ljubomir Zovko, umjesto g. Jadranka Prlića koji je podnio ostavku na poslaničku dužnost.

Prijedlog Kluba poslanika HDZ usvojen je jednoglasno, **pa je tako Ljubomir Zovko izabran za člana Komisije o ustavnim i pravnim pitanjima.**

Zatim je predsjedavajući iznio usaglašeni prijedlog kolegija, da se u dnevni red nastavka 13.sjednice uvrsti davanje saglasnosti na Ugovor o zajmu između Evropske unije i Bosne i Hercegovine, zbog hitnosti.

Prednji prijedlog obrazložio je ministar Mirsad Kurtović.

Povodom ovog prijedloga diskutovali su Zlatko Lagumdžija, Sejfudin Tokić, Vito Rakić i Rasim Kadić. U diskusiji je, pored ostalih, pokrenuto pitanje dostavljanja Parlamentu informacije o zaduženosti Bosne i Hercegovine, na što je ministar Kurtović odgovorio da je informacija sačinjena i da je iznenađen zašto nije stigla u Parlament.

Poslije diskusije predsjedavajući je dao na glasanje prijedlog da se u dnevni red nastavka 13.sjednice uvrsti davanje saglasnosti za ratifikaciju Ugovora o zajmu između Evropske unije i Bosne i Hercegovine.

Od 26 prisutnih poslanika za prijedlog je glasalo 15 poslanika. Glasajući po entitetima iz FBiH glasalo je 12, a iz RS 3 poslanika. Prema tome, prijedlog nije dobio entitetsku većinu, pa nije uvršten u dnevni red nastavka 13. sjednice.

Predsjedavajući je konstatovao da će se prijedlog staviti na nastavak 12. sjednice.

Zatim je sjednica nastavila rad na 2.tački dnevnog reda – **Razmatranje Prijedloga azakona o imigraciji i azilu BiH.**

Presjedavajući Mirko Banjac je pozvao predstavnika Vijeća ministara da se izjasni o amandmanu koji je on kao poslanik podnio na član 1. Priejdloga zakona.

Stav Vijeća ministara iznio je kopredsjedavajući g. Haris Silajdžić, koji je istakao da je Vijeće ministara, u saradnji sa OHR-om, djelimično prihvatio amandman g. Banjca, tako da glasi:

Stav drugi člana 1. Priejdloga zakona mijenja se i glasi:

Strancem se, u smislu ovog zakona smatraju sve osobe koje nemaju državljanstvo Bosne i Hercegovine, u skladu sa čl. 1.tač. 7. Ustava BiH i Zakonom o državljanstvu BiH.

Gospodin Banjac je prihvatio stav Vijeća ministara. Potom se Dom izjasnio o Priejdlogu zakona o imigraciji i azilu Bosne i Hercegovine.

Za Prijedlog zakona glasalo je 25 oslanika, a jedanje glasao protiv.

S obzirom da je Zakon o imigraciji i azilu BiH usvojen velikom većinom prisutnih poslanika, predsjedavajući je konstatovao da nema potrebe obavljati entitetsko glasanje.

Poslije usvajanja Zakona poslanik Desanka Rađević je predložila da Dom donese zaključak sljedeće sadržine:

“Obavezuje se Vijeće ministara da, u skladu sa čl. 7.stav 1, čl. 10.stav 6.i čl. 13. Zakona o imigraciji i azilu BiH, donese odluku o posebnom režimu ulaska građana Savezne Republike Jugoslavije i Reublike Hrvatske u Bosnu i Hercegovinu”.

Povodom ovog prijedloga diskutovali su Haris Silajdžić, Sejfudin Tokić, Halid Genjac, Desanka Rađević, Hilmo Neimarlija, Suada Muminagić, Miodrag Deretić, Radenka Balta i Mirko Banjac.

Poslije diskusije i više replika, te pauze za usaglašavanje, Prestavnički dom je usvojio sljedeći zaključak:

Predstavnički dom Parlamentarne skupštine Bosne i Hercegovine traži od Vijeća ministara BiH da, u skladu sa čl. 7.stav 2, čl. 10.stav 6. i čl. 13. Zakona o

imigraciji i azilu BiH, ubrza aktivnosti i uđe u proces uspostavljanja posebnog režima ulaska građana Savezne Republike Jugoslavije i Republike Hrvatske u Bosnu i Hercegovinu, na principima jednakopravnosti građana i naroda.

Za ovaj zaključak glasao je 21 poslanik od 22 prisutna. Jedan poslanik je bio uzdržan.

Ovim je zvršena 13.sjednica Predstavničkog doma Parlamentarne skupštine Bosne i Hercegovine.

Sastavni dio ovog zapisnika je magnetofonski snimak 13. sjednice Predstavničkog doma.

**PREDSJEDAVAJUĆI
PREDSAVNIČKOG DOMA
Mr Mirko Banjac**